



## Tiga pasangan suami isteri terima APC



Tiga pasangan suami isteri adalah antara 99 staf Universiti Malaysia Pahang (UMP) yang menerima Anugerah Perkhidmatan Cemerlang bagi tahun 2009 pada 26 Julai 2010 yang lalu di Dewan Astaka, UMP.

Tiga pasangan itu ialah Izan Misnon, Siti Roslindar, Hazmin Aris, Mimi Rabita Abd Wahit, Shahrol Azmi Amzat dan Yusmaliza Kamela Mohamed Ali.

Menurut pasangan Izan dan Roslindar yang kedua-duanya merupakan Pensyarah Fakulti Sains & Teknologi Industri (FSTI), mereka bersyukur dan berterima kasih kepada universiti atas pengurniaan anugerah ini.

"Kami bertugas di bawah satu bumbung, justeru, kami dapat berbincang bersama-sama untuk memajukan dan menaikkan nama FSTI.

"Apatah lagi, FSTI merupakan sebuah fakulti yang masih baharu lagi ditubuhkan," jelas Izan lagi.

Manakala menurut Penolong Pegawai Teknologi Maklumat di Pusat Teknologi Maklumat & Komunikasi (PTMK), Shahrol Azmi, beliau bersyukur dengan anugerah ini namun sedikit sedih kerana isteri tidak dapat untuk bersama kerana cuti bersalin.

Tambah beliau lagi, walau bagaimanapun tahun ini cukup bermakna kerana beliau

dikurniakan cahaya mata kedua pada 11 Julai yang lalu.

Bagi pasangan Hazmin dan Mimi pula mereka berpendapat bahawa sikap toleransi, kerjasama dan saling memahami antara satu sama lain menjadi prinsip kejayaan mereka.

"Sungguhpun majoriti wanita kini berkerjaya dan lebih banyak menghabiskan masa di pejabat, namun mereka tetap memikul tanggungjawab sebagai isteri dan ibu," kata Mimi yang bertugas sebagai Pegawai Perhubungan Awam di Pejabat Naib Canselor.

Naib Canselor, Profesor Dato' Dr. Daing Nasir Ibrahim dalam ucapannya mengajak seluruh warga UMP baik staf mahu pun mahasiswa memainkan peranan dalam membina keunggulan sebagai organisasi yang memiliki kesarjanaan jiwa dan keunggulan watak sebuah universiti.

"Walaupun kewujudan kita sebagai anggota kerja di universiti ini terbatas hanya kepada tempoh perkhidmatan yang tertentu sahaja, namun budaya kerja yang cemerlang perlu terus dilestarikan.

"Ianya akan diwarisi sebagai legasi unggul kepada generasi yang akan menggantikan kita nanti," katanya.

"Sikap proaktif hendaklah mengatasi

sikap sekadar cukup atau *complacence* (kepuashatian)," ujarnya

Tambah beliau lagi, kita perlu konsisten untuk menambah baik amalan kerja supaya terus efisien dan berkualiti.

"Seorang pekerja yang cemerlang bukan sahaja dinilai terhadap markah prestasi tetapi juga perlu kreatif dan sentiasa menambah nilai kepada organisasi.

Selain itu, amalan budaya kerja yang cemerlang perlu terus dilestarikan untuk diwariskan sebagai legasi unggul kepada generasi yang akan datang," katanya.

Sementara itu, Pendaftar UMP, Tuan Haji Mustafa Ibrahim dalam kata alu-alunya berharap staf yang cemerlang haruslah luhur budi pekertinya, menjuarai perubahan untuk bergerak maju, berilmu dan mengekalkan keunggulan perkhidmatan yang terbaik.

Beliau menasihatkan warga kerja UMP agar terus membina pasukan kerja yang bersemangat, berinovasi dan berinisiatif tinggi.

"Penganugerahan perkhidmatan cemerlang ini bagi menghargai sumbangan staf dalam membantu universiti mencapai kecemerlangan dan menjadi contoh kepada warga kerja yang lain," katanya.